



降頭師之日常

馬菲 著

降頭師之日常



自序

最初寫降頭師的故事，是緣於接下來第一章提到的一則新聞，說騙子藉降頭之名以欺騙客人「性交轉運」，諸如此類騙案已非孤例，時有聽聞。有說受害人蠢、活該，我嫌這說法不太公道，要知道人遇有不如意事，失去理智，絕非奇事，要怪當然是怪看準他們弱點的壞蛋，存心利用，騙財騙色，實在人人得而誅之。回心一想，想要轉得好運，哪有這般容易，有說建設用百年，催毀只一天，破壞永遠最容易，轉運亦然，所以我就為「性交轉運」添上新解，以戲謔方式寫了第一章的故事。

與其相信「性交轉運」，不如試着「社交轉運」，很多事成功在人脈，多識朋友絕非壞事，有時擴闊圈子才能認識到真正的自己，所以我又寫了第二章的故事。

未料半鬧着玩的短篇故事出奇地受歡迎，連同主角阿拉旺亦頗受讀者歡迎，還收到讀者右貓繪贈的圖像（見後頁），委實不勝感激，為了不辜負支持者，我遂用心續寫下去。最後幸得編輯 Rheona 賞識和牽線下，終有機會在知出版社結集成書，在此我必須再一次感謝她。



人總是對未知感到懼怕，「鬼」是一例，「降頭」亦然。從前，我對降頭的理解大部分來自電影，特別是《南洋第一邪降》，相信很多人都睇過或聽聞過，不過當中最令人印象深刻的卻不是降頭大戰，而是戲中徐錦江的一個奇趣造型。我喜歡降頭電影，由桂治洪的《蠱》，到由陶大宇及顏汗汶扮鬼扮馬的《血胎換骨》都有看，我深信以降頭為題的故事不單只於神秘恐怖互相鬥法，以蠱術害人的層面。正如我於書中其中一句對白「希望將降頭術帶到陽光底下」，所以我想將它的另一面展現到讀者面前，可以是諧趣幽默，可以是樂於助人。

希望大家會喜歡這樣一個與別不同的降頭故事。

馬菲
二零一八年秋





目錄

1.	正解性交轉運	3
2.	社交轉運	13
3.	殺人一定要用到降頭嗎？	30
4.	詛咒娃娃（一）	40
5.	詛咒娃娃（二）	43
6.	詛咒娃娃（三）	56
7.	陞官・發財・死老婆	63
8.	解降	76
9.	一柱擎天	90
10.	黑木童	102



23.	22.	21.	20.	19.	18.	17.	16.	15.	14.	13.	12.	11.
三師會戰	結衣BB	考驗	驅魔人	吸血鬼	三道難題	意外	黑派	陰目偵信	死降	激鬥	極速	障降



01 正解性交轉運

電腦螢幕上顯示的是一則有關性交轉運的新聞，據報一年輕降頭師以性交轉運之名欺騙女信徒，既騙財又騙色，而且受害者眾，降頭師最終於泰國回港後被捕。

螢幕前的男子還未看完整篇報道，已忍不住破口罵：「俾呢啲人渣做爛晒個市。」

男子看不下去，起身往牆角的小桌走去，喝杯開水。男子身穿一襲米白色袈裟似的長袍，沒有被長袍遮掩的地方盡是紋身，都是神佛符咒一類，只有一張臉出奇地乾淨，還帶幾分俊秀。男子拿着水杯的手有幾串珠鏈，頸上則掛有一個黑色的匣子，一般人可能會覺得他奇裝異服，道上的則知道他是行家。

沒錯，他是一名降頭師，叫做阿拉旺，這並非他的真名，而是他師傅賜給他的名字。他是個混血兒，父親是香港人，母親是馬拉人，他姓陳，真名並不重要。

溫水喝過，降頭師抬頭望向掛在羊頭骷髏旁邊的時鐘，距離客人預約好的見



降頭師之日常

面時間已超過十五分鐘，降頭師嘆了口氣。

「叮叮……」掛在門頂的串鈴響起，降頭師等待的客人終於來到，兩位女生，一標緻，一普通，打扮入時，年輕。

「師傅。」兩女異口同聲向降頭師打招呼，卻對自己遲到的事絕口不提。

降頭師心想，換了在他學法那個年頭，對師傅固然要必恭必敬，遲到什麼的，輕則被罵個狗血淋頭，重則被落法落降，豈有便宜了事的；現實卻是生意難做，唯有堆起笑容，跟兩女說：「妳們好！請坐。」

長得普通的那個聽話坐好，標緻那個卻似沒聽着降頭師的話，竟在法舍裏先繞一圈，望着飾櫃上的神像佛像、桌上的法器晶陣、牆上的符咒法令、天花上倒掛的彩帶旗幟等逐一打量，直至看到時鐘旁的羊頭骷髏，眯起眼盯了一回，突然指着它興奮地說：「呢個我知，勁嘢嚟㗎！」

降頭師暗自慶幸這在淘寶淘回來，價值六十八元人民幣的羊頭骷髏終大派用場，忍着笑，嚴肅地說：「個羊頭施㗎法，唔好手指指，大不敬呀！」

美女立即把手縮回，然後終於肯坐下，又說：「不過嗰個羊頭唔係黑魔法用架咩？又話你係降頭師傅嘅，用嚟做咩呀？」

「用咩方法唔緊要，最緊要係幫到妳㗎。」降頭師將話題帶回正軌。



「我無份㗎，我陪佢嚟㗎。我哋之前去咗塔羅夫人度做占卜先嘅，但個卦象就唔多啱心水，塔羅夫人介紹我地嚟呢度，睇吓可唔可以搞搞佢。」普通女說。

降頭師租用的這個單位位於旺角某個商場，曾幾何時是潮童集中地，可惜近年已經式微，遊人不多，故租金不算太貴，但生意一般，商場裏不同商戶有時也會做些連繫幫忙生意，就似普通女剛提到的塔羅夫人就在同層的對角鋪位，介紹生意過來成功的話抽佣半成。

「不如話畀我知妳哋叫咩名先啦！」降頭師說。

「我叫二汪，佢叫茄雲。」普通女說。

「好，茄雲，妳遇到咩問題呢？」降頭師問美女。

「條仔出去偷食，畀我篤爆㗎，然後……然後要同我分手呀……」美女沒法再說下去，因為她已在爆喊。

「咁你想我點幫你？」類似的故事，降頭師已聽得太多。

「我要落佢老母降頭。」美女說。

「講清楚，落佢定落佢老母？」降頭師想確認。

「落佢先真。」美女說。



降頭師之日常

「咁個條女呢？我指勾妳男友個嘢呀！使唔使落埋呀？」降頭師想問清楚，因為這陣子有優惠，第二位七五折。

「哦？咁又唔使。」美女說。

「有需要開聲，唔怕喎！我哋舖頭宜家做緊優惠，第二個有七五折㗎。」降頭師說。

「其實都唔可以話個女仔勾我男朋友，佢都唔知佢有女嘅，我男朋友不騮都鹹濕㗎啦，成日出去溝女㗎！」美女說。

「咦，妳份人都幾講道理㗎喎。咁妳宜家想落邊種降？呢度有好多隻揀，隻隻唔同收費。嘩，我可以介紹妳……」降頭師未說完已被美女打斷。

「梗係愛情降啦！我要箍佢返嚟我身邊，以後都唔畀佢走。」美女說。

「妳啱先唔係話佢係賤男咩？仲要箍佢返嚟做咩呀？」降頭師說。

「其實佢好好㗎，唯一缺點就係鍾意滾之嘛！如果我落個愛情降令佢淨係鍾意我就得啦！」美女說。

「妳呢啲女仔我都唔係第一次見㗎喇，不過我係有責任提一提妳咁解啫。既然係咁，好啦，盛惠六千八，相金先惠，然後再畀我佢嘅時辰八字、相、頭髮、



衫褲，若然有埋精液同妳嘅經血，咁個降就真係勁喇！」降頭師說。

「經血就過兩日有啦！但無啦啦邊度搵佢啲精畀你呀？無噃真係。仲有佢生日我就知啫，時辰鬼知咩。」美女說。

「咁樣呀，咁樣照做唔係唔得，不過效力無咁勁，如果佢本性鹹濕，箍得佢一年半載都係走㗎咋。」降頭師坦白。

「吓，咁點得㗎？如果我箍唔住佢，我就要佢不得好死。」美女激動得眼角帶淚。

「咁嘅降就唔係話無，但妳唔齊料，始終威力有限㗎咋。」降頭師說。

「咁點算呀？又話你好有料嘅，你要幫我呀，我真係接受唔到佢同第二個女人一齊呀！」美女說。

「如果妳只係唔想佢同其他女人一齊，有辦法。」降頭師說得很堅定。

「點呀？」這次，連普通女都異口同聲，引頸以待。

「要唔要試吓性交轉運㗎？」降頭師說得一本正經。

兩女聽到卻立時面有難色，普通女甚至拍枱大罵：「你當我哋兩個係啲咁好易呃嘅蠢女人呀？」



降頭師之日常

「咪係，我有睇《警訊》㗎，想我畀你搞，想創你個心呀！」美女說。

「妳兩個冷靜啲，聽我講，我講呢款性交轉運，係唔使同我性交嘅。」降頭師說。

「咪扮嘢㗎，我睇新聞話個降頭師又食又拎㗎。」美女說。

「噃，妳唔好拎我同佢比，佢黑派，我白派嘅，師承南洋第一降頭師亞尼吉帝，絕對係真材實料，童叟無欺㗎吓。」降頭師解釋。

「你意思即係你勁㗎呀？」美女問。

「就唔係話邊個勁唔勁㗎，總之就唔同派，大家做法唔同嘅。」降頭師說。

「咁點轉運法呀？講嚟聽下，噃，講明呀！同第二㗎人做我都唔制㗎。」美女說。

「話明性交轉運，性交就梗㗎喇，但就係同妳個目標人物性交，妳個個案嚟講，就即係你條仔啦！」降頭師說。

「吓，條仔咁賤仲幫佢轉運？」普通女插嘴。

「妳聽完我講先啦！㗎人成日一聽到轉運就以為係轉好運，其實全部錯晒，畀個一萬幾千就轉到好運咁易喇㗎，咁呢個世界仲有人濕滯嘅？要轉，就係轉衰



佢。」降頭師說。

「又好似有幾分道理㗎。咁可以轉到點衰法呢？」美女問。

「我呢個性交轉運大法，只要目標人物一中招，一定行衰運行到貼地，我敢擔保，佢去廁所就無廁紙、等巴士等極無車，一點煙架巴士就嚟、想打乞噏打唔出、出咗門口先發現電話無電但又唔記得拎尿袋……」降頭師未數完，普通女又插嘴。

「呢啲碎料嚟咋㗎，有無啲毒啲㗎？咒到佢癌症之類啲㗎呢？」普通女說。

「小姐，降頭呢家嘢有咩依郁會反彈架，如非必要就唔好咁陰毒，佢而家只係想第二啲女埋唔到條仔身㗎，噏，做完呢個性交轉運，我包條仔抄親牌都抄唔到，有女肯俾佢抄佢都抄錯，總之就咩女都食唔到啦！」降頭師寫包單。

「好，我就要呢個。」美女拍板決定。

「噏，講明呀，呢個價錢貴少少㗎，收費八千八，如不成功，原銀奉還。」降頭師說。

「如果佢真係以後溝唔到女，多啲兩千蚊豪畀佢啦！不過我今日無帶咁多上嚟，落住三千蚊訂先，過兩日拎啲經血上嚟時畀埋個尾數你得唔得呀？」美女問。



降頭師之日常

「得，無問題，過兩日見啦。」降頭師說時伸手取過三千大元。

兩女正要起身離去，降頭師卻又把她們叫停。

「做咩呀？」美女回頭。

「無，畀張卡片妳啫。」降頭師遞上卡片。

「你張卡片我哋有啦！」美女說。

「呢張卡片唔係我㗎，係樓上『心有靈犀』㗎，佢哋就定期搞啲 Speed Dating 活動㗎。我見妳個人都幾講道理，其實搞得性交轉運，不如都試吓社交轉運啦！舊嘅賤男，咪開過門囉，況且妳咁靚女，無謂浪費青春㗎！呢個係增值服務，話我介紹有八折㗎。」降頭師說。

「車，靚仔啲啲都係做媒嘅，剩低啲啲又九唔搭八，你估我唔知呀。」美女說。

「噏，咁妳又唔使擔心，只要我幫妳擺返個愛情陣，另外加個催情符，包妳溝咩仔有咩仔，做媒個個都忍唔住嚟溝妳，到時就好運自然來啦！舊客幫襯有優惠呀！」降頭師說。

「我先唔稀罕，我仲未放得低我BB呀！」美女回身就走。



降頭師正想收回遞出卡片的手，說時遲那時快，卡片「嗖」的一聲被奪去，落入普通女的手。

「個陣同道符係咪真係咁堅先？」普通女問。

「堅，見係妳，收順啲，三千八，包搞掂。」降頭師說。

「無問題，過兩日上嚟。」普通女說。

「好呀，我成個下晝都喺度，唔啱打個電話過嚟先得。」降頭師說。

「係咁，到時再講啦！」普通女回身跟着美女走去。

「『心有靈犀』嗰度記得話係我介紹，有八折呀！」降頭師不忘提醒。

兩女走了，法舍回復寧靜，下午已經再沒預約，降頭師又回到電腦桌前，玩他的Facebook。玩了一會，見有點肚餓，望一望那掛在羊頭骷髏旁邊的鐘，原來早過了三點三，便打算打電話叫外賣，正在煩惱要炸雞批紅豆冰還是西多士凍鳶之時，電話響起，舊客。

「喂……」降頭師只說了一個字，對方即連珠炮發。

「師傅，上次你賣畀我件嘢真係好掂呀，戴咗上身之後溝咩女有咩女，最勁係我啱啱聽咗個電話，連我個ㄣㄨ都突然打嚟約我出去執返劑呀！」電話傳來一



降頭師之日常

把興奮的男聲。

「咁咪好囉，恭喜你呀！所以上次啲五千八真係無收貴你㗎！噃，我早兩日新入咗個陣，旺財嘅，我留返畀你㗎喇，見係你，齊頭五千有交易，你搵日上嚟睇睇啦！」降頭師說。

「好呀，我下個禮拜上嚟，帶多個Friend添，佢有嘢想搵你幫手呀！」男子說。

「無問題，你幾時得就Whatsapp我啦！再傾。」降頭師說罷收線，竟忘了叫外賣，繼續玩他的電腦，未幾又發現另一則吸引他眼球的新聞。

賤男疑與前女友來最後一擊，戰正酣時遭女方咬斷陰莖，負傷送院駁回，醫生表示可能只剩三成功力。女方遭拘捕，並將接受精神鑑定。記者就該案諮詢愛情學家意見，專家表示「前度回頭，必然有詐；切忌亂上，慎防抱憾。」看到這裏，降頭師驀地醒起自己要叫茶餐，遂打了電話。

「喂，祥利呀，要一份西多士，就加杯凍鳶，送上樓上二一八呀……」



02 社交轉運

兩天後，普通女二汪中午就過來了，降頭師阿拉旺桌上的西炒飯才吃到一半而已。

「二汪小姐，乜咁早呀？唔打個電話嚟先？」阿拉旺說。

「無，我咁啱經過呢頭，咪上嚟先囉。」二汪說謊，她是中午飯也未吃就趕過來的。

阿拉旺知得一清二楚，她接下來要問的事，不想讓她的美女朋友知道。

「師傅，上次你提過個個社交轉運，你係咪真係幫到手呀？」二汪問。

「梗係啦，法寶都幫妳準備好喇喇！」阿拉旺說畢便從飾櫃小心翼翼地取下兩件法寶，放到桌上，分別是一個晶陣及一道符咒。

「嘩，呢個晶陣，返去放喺床頭，最好係日頭曬到太陽夜晚曬到月光嘅位，妳晚晚瞓覺吸收佢嘅能量，桃花運爆硬，都只係收你三千六。」降頭師將以六條錐角粉紅晶砌成的晶陣推到二汪面前。



降頭師之日常

二汪打量了晶陣一會，說：「呢個陣咁似我喺樓上間『戀愛世紀』見到個嘅，人地賣千八咋嘅。」

阿拉旺臉不紅、氣不喘地說：「晶陣望落或者冇幾分似，但我呢個晶陣係經我法力加持，威力提升咗幾十倍，而且妳頭先冇無聽到我叫你點做？要放喺吸到日月精華嘅地方，就係要養住我嘅法力，咁先夠勁。而重點係要配埋我道符。」說畢又將符咒推到二汪面前。

「鬼畫符咁嘅。」二汪說。

「符係我畫嘅，而且仲加咗我啲血落去，法力唔駛講，就係勁。帶住喺身，包妳行出去一街啲仔都吸妳，加埋我個晶陣，溝咩仔咩仔都冧妳呀！」降頭師說時信心滿滿。

「咁溝女呢？」二汪問。

「吓，乜你要嚟溝女㗎咩？」這下出乎阿拉旺意料之外，雖說他也沒有處理過類似個案。

「唔係，多口問吓㗎。」二汪說。

阿拉旺抹過把汗，解釋：「女溝女，就要用過第二個組合，價錢貴啲，而且要交樣嘢畀我作法先得。」



「又要經血呀？也得成日咁污糟㗎？」二汪女說。

「妳聽埋我講先啦！女溝女，係要用男人嘅眼淚。」阿拉旺說。

「哇，咁刁鑽㗎，無端端去邊度搵男人眼淚呀？」二汪說。

「如果有需要，本法師可以代勞，不過就收費嘅，妳係咪有需要㗎？」阿拉旺說。

「唔係呀，我都話我多口問吓咯，如果我有朋友有需要就叫佢嚟搵你啦吓！咁宜家呢度幾錢呀？」二汪問。

「晶陣頭先講咗啦就三千六，道符就千八，加埋五千四，但我話咗畀優惠妳，就齊頭五千啦！」阿拉旺說。

「有無得平啲呀師傅？我再介紹朋友嚟㗎。」二汪議價。

「阿女，呢啲嘢唔講得價㗎，係大不敬，我份人隨和就無咩所謂，出面有啲師傅聽到講價，真係唔知會做咲咩㗎，妳以後咪制呀！價就無得講㗎喇，最多唔靈我就全額退款。」阿拉旺說。

「嘩，你話㗎，我係『心有靈犀』BOOK咗星期六個活動㗎喇，試過唔靈就返嚟搵你算帳。」二汪說時放下五千元。



降頭師之日常

阿拉旺把錢收起，說：「放心啫，包搞掂。係喇，妳有無話係我介紹呀？八折啫。」

「有呀講咗喇，師傅你咁長氣㗎。」二汪埋怨。

阿拉旺當然要長氣，因為經他介紹是有回佣收的，一樣是半成，口裏卻說：「呢啲係增值服務，我有責任關心每一位客人嘅。」

這時候，二汪的手機響起了訊息音，原來是她的美女朋友來訊，說已到附近。「叫佢過嚟啦！」阿拉旺說。

星期六，傍晚，阿拉旺不在法舍，而在地鐵站裏等候下一班開往上環的列車，乘着等車空檔，他朝玻璃幕門望去，為自己整理衣裝。今天他並沒有穿上法袍，改而穿上一件DKNY黑色暗花長袖企領恤衫，下身配上Desse牛仔褲，還有Lacoste皮鞋，手上的珠鏈換成了CK手鐲，耳珠上的圓環亦除了下來，換上了閃石耳環。

看來，是有個重要約會。

來到上環，阿拉旺走到一間樓上餐廳，地方不算高級，勝在私隱度高，阿拉



旺依一早收到的短訊指示，來到十號枱坐下。

現場的都是四人座，然而十號枱暫時就只得阿拉旺一人，他輕輕拉起袖子，看看他的奧米加手錶，原來自己早到了十五分鐘，怪不得還未見其他人，遂拿出手機，一邊應答客戶的查詢，一邊等候。

未幾，人客陸續進場，十號枱除了阿拉旺之外，另坐了一男兩女，大家互相點頭招呼之後，又落下一陣沉默。

沉默並不漫長，客人大多準時進場，而且看上去都經過悉心打扮，男的造型大都斯文大方，女的則典雅高貴，至少都清潔整齊，二十男二十女中只有三兩人的打扮格格不入。所有人就座後，一名身穿淺紫色Dior套裝的中年女人帶着微笑進場。

中年女人拿着麥克風走到場中，說：「歡迎大家今日嚟到我哋『心有靈犀』嘅聚會，我係主持Eva。」

無錯，阿拉旺出席的是之前跟二汪提及過，由「心有靈犀」舉辦的速配活動，Eva正是「心有靈犀」的老闆娘。

現齡四十八歲的Eva打扮過後於燈光掩映下倒算明艷照人，經挑染的長鬚髮暗泛薰衣草般的淺紫色，配上她身上一襲紫衣，看上去有點像「紫衫龍王」江欣



降頭師之日常

燕，據聞她二十多年前，是在中上環十分有名的「Ba后」，裙下之臣眾多，她拍拖的次數更多達四十七次，或許正是這份豐富的戀愛經驗，促使她選擇了與戀愛有關的職業，並創立了公司。

上一次阿拉旺向兩女提到社交轉運時，美女茹雲就提出質疑，那些活動裏頭的型英帥都是做媒的。當然，現實中不一定所有型英帥都是做媒，但阿拉旺的確是因此而出現。

年三十有六的阿拉旺，憑着帶幾分帥氣的臉孔，獲TVB邀來做媒，靠的除了帥氣，還多得歲月在他身上留下的痕跡，看上去多了份成熟感，不似一般小白臉或花花公子，頗受女性歡迎，再加上他很會說話，所以亦比普通的媒多出五百元薪水，出動一次可得一千大元，於行情中算是高級媒。

TVB的開場白對阿拉旺來說並不緊要，他早聽得倒背如流，不外乎是先客套幾句，然後介紹一下活動流程、遊戲規則等。一會活動開始，每張枱會有七分鐘時間供同枱的兩男兩女聊天，夠鐘後男的要起身轉移到另一張枱，女的則留守等候新一批男士到來。如此這般，重複九遍，你就認識在場所有的異性了。

有時，阿拉旺會覺得自己是一件迴轉壽司，他幻想自己是一件海膽三文魚子軍艦，而跟他同一組，剛認識叫做Miss的男生，要不是玉子壽司，就是腐皮壽司。



活動一開始，Wilson 就急於介紹自己，他是個運動用品銷售員，今年三十二歲，嗜好是打乒乓球，家住屯門，是一個平穩踏實的開場白。

阿拉旺從不報上自己的真正職業，這是跟 W 的約定，他亦從不在場拉客，一般都會報稱自己是運輸或物流從業員，興之所至時也會扮演一下會計師或測量師等不同角色，今天他是一名貨櫃車司機。

「睇你個樣唔似喎。」同枱的女生▷質疑。

「係囉，未見過咁樣嘅貨櫃車司機囉。」同枱的女生⊠附和，兩人應該是朋友。

「咁妳哋覺得貨櫃車司機應該係點㗎呢？」阿拉旺說。

「多數都係麻甩佬，有肚腩、地中海，成身臭汗咁囉。」女生▷說。

「仲有多數鍾意喺大陸叫雞。」女生⊠說。

「哇，妳哋咁樣講，喺外國真係告得妳歧視呀知唔知？邊一行都有新人入行㗎啦，宜家好多行家都又後生又靚仔㗎。」阿拉旺說。

女生▷再一次打量一下阿拉旺，見他身光頸靚，就問：「揸貨櫃車搵好多㗎咩？」



降頭師之日常

「以前嘅事啦，我後生入行時已經係水尾，好在都仲有少少搵到吓咁。」阿拉旺如是說，其實他一身名牌是他唯一的名牌，要來出席重要場合用，例如見一些較富貴的客人，類似的衣裝他多一套也沒有。

「你宜家都唔係好老啫。」女生ㄟ說。

「我三十八㗎喇，所以先急住想搵返個女朋友之嘛。」阿拉旺多報上兩歲。

「我唔信你識唔到女仔囉。」女生ㄟ又質疑。

「我哋嗰行都無女仔嘅，識嚟識去咪大陸啲髮廊妹呀，夜場ㄟ咁，我都唔啱嘅。加上我哋揸長途車，成日唔見人，想搵個女仔拍拖都難啦！」阿拉旺說得頭頭是道，全因他之前的一個客人正是貨櫃車司機。

女生還待再問，豈料鐘聲響起，短促的七分鐘經已過去，男生離座換枱，就在離座的剎那，阿拉旺已經忘掉了兩位女生的名字，在這個場合，女生對他來說直如走馬燈，轉眼即逝，不帶留戀。

來到第二、三、四張枱，阿拉旺都不過將剛才於第一張枱說過的話約略重複一遍罷了。

直至第五張枱。

降頭師之日常

發行者

香港聯合書刊物流有限公司

香港新界大埔汀麗路36號中華商務印刷大廈3字樓

電話：(852) 2150 2100

傳真：(852) 2407 3062

電郵：info@suplogistics.com.hk

承印者

美雅印刷製本有限公司

出版日期 二零一八年十二月第一次印刷

版權所有 • 不准翻印

Copyright ©2018 Wan Li Book Company Limited.

Published in Hong Kong by Cognizance Publishing,

a division of Wan Li Book Company Limited.

ISBN 978-962-14-6889-5

著者

馬菲

編輯

Na Na

美術設計

吳廣德

出版者

知出版社

香港鯉魚涌英皇道1065號東達中心1305室

電話：(852) 2564 7511

傳真：(852) 2565 5539

電郵：info@wanlibk.com

網址：http://www.wanlibk.com

http://www.facebook.com/wanlibk

降頭師，本是藏身於黑暗中的神秘職業，但隨着時代進步，

越來越多降頭師走到陽光底下。

主角阿拉旺師承南洋第一降頭師，屬白派一系，

以降頭助人為主職，少作陰損之事。

因此，阿拉旺開的法舍經常門可羅雀，

他為了維生扭盡六壬，不單與附近不同商舖合作，

而且什麼騎呢工作都照接不誤，

包括參加速配派對、捉姦在床、為客人「重振雄風」等，

發放連環笑蛋。最後更與不同強敵，包括別派高手火拼，

連場好戲，精彩刺激。

全書採單元模式，多篇故事，行文俐落爽快，

故事中有不少八九十年代的經典電影電視劇場面，

搞笑之餘亦是讀者們的集體回憶。

網上書店  超閱網 SuperBookcity.com	ISBN 978-962-14-6889-5  9 789621 468895	 聯合出版集團 HK\$88.00 Published in Hong Kong 建議上架：流行讀物 / 小說
--	--	---